

四庫全書

集部

欽定四庫全書

集部

雲溪居士集

目錄  
卷一至三

詳校官庶吉士臣吳烜

侍讀臣孫球覆勘

謄錄監生臣朱起鳳

謄錄監生臣龍舜耕

欽定四庫全書

集部三

提要

雲溪居士集

別集類二宋

臣等謹案雲溪居士集宋華鎮撰鎮字安仁會稽人元豐二年進士官至朝奉大夫知漳州軍事鎮原集本一百卷又有揚子法言訓解十卷書說三卷會稽覽古詩一百三篇長短句一卷會稽錄一卷并附哀文一卷通一百十七卷紹興

十三年其子初成哀集刊刻曾表進於朝又鎮上蔡  
樞密書自云有所作王制解一編而初成所為  
狀跋則不載是書蓋當時已散佚矣其集諸  
家書目皆不著錄寶慶會稽續志但稱鎮好  
學博古嘗作會稽覽古詩一百三篇不及其集  
惟焦竑經籍志載雲溪居士集一百卷而其他  
著作亦均未載近錢唐厲鶚編宋詩紀事僅從地  
志之中抄得會稽覽古詩九首知自明以來是

集無傳本也茲於永樂大典中掇輯詮次釐為三十卷雖未能頓還舊觀然原刻卷數已得三之一矣樓炤序其集曰精深典贍道麗逸發又曰介然自重不輕以求人之知其名之不昭也固宜然觀其學術大抵以王安石為宗且與蔡京章惇輩贈答往來干祈甚至炤之所云未必遽為公論特幸不為京輩所汲引故尚未麗名姦黨身敗名裂耳至其所為

詩文則才氣豐蔚詞條暢達雖不足與歐曾  
蘇黃比絜長短而在元豐元祐之際亦裒然  
自成一家置其人品取其文章可矣乾隆四  
十六年九月恭校上

總纂官

臣紀昀  
臣陸錫熊  
臣孫士毅

總校官  
臣陸費墀

雲溪居士集原序

始余得故朝奉大夫華君鎮會稽覽古詩一百三篇知其為好古博雅之士也疑其文采足以竦動時聽而名不昭何哉紹興壬戌來為是邦君之子初成奉君文集一百卷求余文冠其首曰多矣哉余既得盡觀其文又益以知其人蓋介然自重不輕以求人之知也其名不昭固宜君之文精深典贍而詩遒麗逸發其它衆製爛然皆有體則非涵養蓄蘊之厚不能發之如此也元豐

間孫覺豐稷在朝皆薦君堪博士不報卒老州縣其治  
行泯沒不得顯白于世矣而文又不昭焉嗚呼有可惜  
哉然初成能盡力以圖傳君之文於世亦足以不朽矣  
君嘗自號雲溪居士用以名其集紹興癸亥八月晦日  
資政殿學士左朝奉大夫知紹興軍府事兩浙東路安  
撫使馬步軍都總管樓炤序

按宋史樓炤傳炤字仲暉永康人登進士第紹興十

四年以資政殿學士知紹興府事過闕入見除簽書樞  
密院事而炤序題云紹興癸亥知紹興軍府事云云鎮  
子初成狀跋云茲者樞密資政樓公來帥會稽末亦題  
云紹興十三年癸亥是炤即於是年知紹興而旋復內



擢史稱十四  
年者誤也



華初成進雲溪集原表

臣初成言伏覩明詔搜訪書籍者竊以藏在私家業久  
虞於失墜迨茲盛世書方切於褒蒐十行爛雲漢之章  
六丁謹雷電之勅束帛有賁輜軒載奔發孔壁所藏盡  
禹穴之探殘編蠹簡片幅斷碑煌煌乎盤盂之銘矯矯  
若鍾鼎之字下為稗說上極皇墳莫不裊載而來肩摩  
自列羣言入奏不惟漢牘之三千秘府遂盈何止唐卷  
之八萬曲盡古今之目大增文物之光宜臣激悞氣於

衷腸永孝思於手澤顧惟家學難冒天聰臣初成誠惶  
誠恐稽首頓首臣聞剖楹發書言徒遺於子壯在枕置  
藁上繫待於時明事則殊塗誠終共貫巾箱舊矣卷軸  
紛然鑠鑰一開湛凝塵而盡去纓冠再拜疑遺墨之未  
乾慷慨移時想見平日或訓過庭間之授或侍執燭際  
之成因欲傳家儻能垂世歲深道遠懼將泯沒而無傳  
風動雲興欣值作成之有道勉思自竭冒昧上陳恭惟  
皇帝陛下湯聖日躋舜德天合至仁曲被於動植大孝

足通於神明慶明良千載之逢鞏祖宗萬世之業政刑  
振起號令興行卧鼓橐弓固已掃除於氛翳橫經講藝  
又將黼藻於太平衣冠之屬羣趨弦誦之聲四合如先  
臣鎮生於遠俗起自諸生係志斯文當哲皇徽考朝嘗  
有述矣召試博士如孫覺豐稷輩更推挽之既艱遠業  
之圖尤重空言之託丘山仰止曾毫末以無遺日月行  
焉苟容光而必照臣是用載在方冊悉上送官雖未能  
裨丁部之多庶幾塵乙夜之覽野人屬意獻徒効於美

芹先臣有知忠尚期於結草今有先臣雲溪集凡一百  
卷揚子法言訓解一十卷書說三卷會稽覽古詩一百  
三篇并目錄二十五冊謹繕寫隨表上進干冒天威臣  
無任瞻天望聖戰慄屏營之至謹奉表以聞臣初成誠  
惶誠恐稽首頓首謹言紹興十四年六月日右朝散郎  
監行在權貨務都茶場賜緋魚袋臣華初成上表

欽定四庫全書

雲溪居士集目錄

卷一

賦一首

卷二

古體詩二十五首

卷三

古體詩三十首

卷四

古體詩二十七首

卷五

古體詩十四首

卷六

古體詩十四首

卷七

今體詩五十二首



卷八

今體詩四十五首

卷九

今體詩三十九首

卷十

今體詩三十四首

卷十一

今體詩十二首

卷十二

今體詩七首

卷十三

今體詩七十四首

卷十四

論七首

卷十五

論五首

卷十六

論六首

卷十七

論八首

卷十八

論七首

卷十九

論四首

卷二十

論十一首

卷二十一

書十七首

卷二十二

書十五首

卷二十三

書十九首

卷二十四

書十四首

卷二十五

啟三十六首

卷二十六

啟六首

劄子三首

卷二十七

表九首

策問六首

卷二十八

記七首

卷二十九

銘一首

序二首

引一首

題後一首

說三首

傳一首

墓志一首

卷三十

祭文十五首





欽定四庫全書

雲溪居士集卷一

宋 華鎮 撰

賦

感春賦

遺微公子玉韞東山淵黑蘭澤結丹桂為華寢製荃荷  
為縫掖藝道術之嘉種菟德園之鮮食掇英榮於藝圃  
銓朋遊於虛寂從容卒歲泊然自適者久矣一日乘春  
晴駕華軫歷三川瞰太清出入關河徜徉都城俛焉有

傾仰焉有營心動氣變怫鬱紛紜若有所感而中失其  
平於是拂衣整巾旋轅動輪馳騫康莊造乎高明丈人  
而問焉即席丈人曰吾聞意態怒如者飢於食也筋節  
乏弛者勞於力也神奪氣褫者屈於理也膚革姜蕤者  
傷於疾也精耗神散者老而衰也吟秋賦雪者感節物  
也蹙頞頻眉者懷憂危也此皆物觸於外志變於內情  
動其中發興形容故嗜好失常而色理不類今公子曾  
腹便便其中果然養固豐矣曳裾垂佩徊翔容與靡有

勞矣志大氣剛采色孔揚無所屈其豪矣且食息平和  
既安且寧凝脂點漆又非頽齡妬粲粲之嘉時詠詩禮  
於趨庭從事無獨賢之勞出疆無荷戈之征奉慈嚴以  
致養合孺稚以樂生無憂危之懷矣遲日逶迤微風扇  
和草木欣榮淥水騰波非感慄慄而傷遲暮之日矣然  
而公子色變意沮頽然心醉若有羨而弗得慨所慕之  
莫致何為而然乎敢聞其說公子曰若丈人者可謂見  
其一而知其二視其表而得其裏者也鄙心之私信若

所教方將濯塵垢於言泉發矇瞶於辯囿辱問敢不敬  
告僕投跡隱約棲情素朴頌詠前修尋研方策積腐草  
之微曜映晁消之殘白蓋亦有年矣生於清夷無事之  
日覩芳時之屢更曾未嘗揚眉明目眎天日之佳麗解  
顏發齒道物色之榮華前日脫屣下國拭目神臯覽豐  
鎬之作京歷成周之四郊其山則伊闕轅轅如墉如門  
底柱大岷折柳洪源嵩少維屏峻極于天二嶠關關三  
峰竦蓮岐梁挾石太一在前傍引九峻斜界甘泉包籠

牛首至于黃山其水則滎洛經其南大河緯其後溫液  
效其珍鄭白資其富涇渭灌於都中伊瀍夾於左右其  
邑則都城言言崇高九雉廣路三條通門十二九市鱗  
差千閭櫛比皇居在中蔚然壯麗其宮則東有永安西  
有未央前有栢梁後有建章桂宮五柞長樂明光蓬萊  
大明興慶上陽寔葉欽艷千載相望琢雙壁以抗門飾  
威鳳以表闕南端俯瞰於清泚應門上切於膠轕雲龍  
神虎左陪右列金狄瞰睨仙莖條達神明聳臺以突兀

井幹飛樓而煥爛華清繡錯於泉流翠微綺結於山半  
屬玉飛廉之館平樂上蘭之觀濯龍芳林之園西園上  
林之苑太液寫景於溟渤昆明擬跡於雲漢列三島以  
鼎峙抗牛女而中判迎風露寒長楊豫章之館三十有  
六徧於圻甸金張甲第許史之廬冠軍寵賜汾陽宴居  
中通永巷跨坊兼閭綠野金谷裴石所除華堂綺閣文  
疎藻櫨窮美極觀宸居是模嘉木成林清流溢渠鳴禽  
馴獸瞻聆可娛於是師尹常伯三事大夫金馬瀛洲之

彥蘭臺麗正之儒宴私夕退禁省晨趨飛華纓於紫闥  
交文駟於通衢五公族姓七相華胄邠寧岐薛之客田  
竇閭梁之友三選州郡之豪五都貨殖之後朱劇趙張  
之倫探丸剔鼓之醜販脂粥脯之室洒削馬醫之叟靡  
不聯騎鳴珂介鷄走狗捐百萬以呼盧輕千金而貫酒  
攬芬秀於宮藥蔭葱蒨於禁柳追物色以遊行既目前  
之所有若夫鱗介隱伏羽毛細微卉木生殖無情無知  
亦皆揚鬢鼓鬣振迅羽儀含英發秀方鶯乘時故王鮪

萃於龍門辟天波而奮飛谷鶯遷於上林占喬木之高  
枝蜂蝶翕集拂箔穿帷燕雀來往頡頏差池井梧凝露  
而載華宮槐遡日而含舒長楊飛絮於天池弱草成茵  
於金堤僕曾未嘗躡上林之輕塵依觚稜之清影沐微  
和於暖律承末光於麗景是鶯鵲蜂蝶燕雀槐柳之未  
若又安可鄙馬醫之賤而慕豪右世族之侈哉且難得  
而易失者明時也既往而不再者壯年也流逝迅激曾  
不我與者節物也芳華九十忽焉云暮隙駒石火未足



喻其疾方強壯而邁盛明不得極春遊之歡虞覽上國之勝麗與有生者欣發育而樂交泰是猶守糠粃於豐年違大明於暗室豈不戚歟此僕之所感而自憐者也願幸承教無使久其病丈人曰惡有此哉公子不以是為樂則已矣如其樂之何病之有且山川之勝則融結於郊圻都城雖峻而高門洞開宮闕之麗煥乎天街名園甲第羅列如棊天子弛園囿之禁如周文之治岐雖葛菟雉兔亦往焉而如歸況遊覽之佳士復何虞於禁

司彼裴石之林壑固寓目其奚疑雖然乏許生之勝具者浪投跡於山水無庶卿之大嚼者徒垂涎於屠門君子探奇索偉必有軼越之器賞物覽景必有虞樂之事然後遼濶迥末咸暨而無違美情寫興適極耳目之好而不負所值遇公子之蓄積諒既美矣子特未之間也試言其槩公子曰何謂也丈人曰園客之絲獨繭飛緒修纖縞潔繹之無類吳蜀之工經理色素寒禱葉於夕煙擷朱華於朝露丹之青之式改其故如漆如金玄黃

間錯翻新騁工以織以組綺錦繁綴綾紉修姱綃縠虛  
勻羅紋交布縵若文貝輕如流露素手運刀明眸審度  
引以南金之針絰以冰蠶之縷旋員應規直方中矩溫  
清之適與時無迂此服飾之美也公子有之乎曰蜉蝣  
楚楚風人所刺則不敢為奢儉之間稱時之製亦有之  
矣丈人曰西山之檀產於厓石本支碩大有樛有直根  
聯絡於礪砢稍凌摩於峯嵒夏則畏日火雲照射爆爍  
融熬脂液冬則霜風憂擊條披枝折積雪層冰下沍其

側續理而堅與石同色於是使奚仲操式輪扁運斤因  
直為轅合曲成輪浮沈應準輕重符鈞服以代北之駟  
驂以渥洼之駟王良秉轡纖阿執鞭駛如流水輕不動  
塵此陸遊之具也公子有之乎曰美澤可鑒見譏前史  
敢不為戒柴車款段致遠之備亦有之矣丈人曰江湖  
之間地極東南其土塗泥疏而不暝

按暝原本作映語不可解韻亦不叶

當是暝字之訛暝而宣切亦作塤塡塡沙土也於義正合韻亦適諧緣字形與映相類故原本誤作映耳其

氣多陽雖冬寡寒南風無時四節常暄清泉漱石淡泊

潺湲是生良材厥名木蘭理疎而柔輕而善浮在水益  
堅可以為舟公輸之徒翦落條枝以剔以剗使其中虛  
參四載於神禹稽渙象於庖犧繚以青瑣覆以筠廬魚  
文鷁首龍鱗陸離剗菌桂以為楫紉貝錦以為維凌文  
波而蕩漾若鷗鷺之虛徐此川遊之具也公子有之乎  
曰通達之道水泉處其半舟楫不備行路斯難剗剗之  
器亦有之矣丈人曰鄒嶧之陽泗水之陰猗梧特生擢  
秀百尋溫淳清越樂磬之石負抱而孕育玲琅而激冽

鳴泉之響滌洄而浸淫資所感於朝夕含太和之雅音  
披翦孫枝為瑟為琴固以醇漆絃以縷絲軫以玉珥徽  
以兼金播蘭雪之絕唱詠薰飢於棘心息虧成之奇辨  
役賞悟於高深淵魚鼓舞而出沒六馬仰秣而沉吟此  
聲樂之美也公子有之乎曰君子無故琴瑟不去僕雖  
不美敢不從事絲桐之器亦有之矣丈人曰會稽之楮  
業結杳冥碧葉蒙籠瑤珂枝撐零露沆瀣朝以滲漉雲  
腴烟素觸而宵凝剡川之湄蜿蜿垂藤纖根旁引絡莫

稜層紫梢高驤凌霄上騰剔輕膚之柔素和寒液之清  
澄密若繭綴潔於層冰膩比凝脂勻如垂繒蜀麻腐脆  
而未工簡策滓滯而非朋代截裂於邊幅便舒卷於纖  
縢中山之兔栗林之鼠褐毛紫穎修髯勁尾剔以象櫛  
齊以霜匕沐以蘭湯纏以繒紙束員筠以就握運煙膠  
於秋水揮灑縱橫淋漓披靡既小大以成體又愜心以  
順指上黨之松其壽千年凌厲霜霰枝目擎拳變化石  
之赤心飛脩突之珠煙代郡之獸辟質素斑卧石飲冰

便險能寒結幽朔之勁厲戴雙舸之石堅液銛端之流  
膏就芳煤之脩員發華采於毫素飾文辭於簡編良玉  
推其績栗醇漆慙其未玄漳河之湄齊魏故都冰井舊  
物銅雀之餘翡翠顏色鴛鴦規模人世非兮川河未改  
棟宇傾兮堙淪路隅霜鴻千度過煙草幾番枯邈歲月  
之淹久飽泉壤之霑濡或僅存於圭角時見獲於犁鋤  
含精耀黑不頑不稭肖員方於珪璧角溫潤於珣玕若  
夫愜賞遇之心覲物象之勝激涌泉之藻思感凌雲之



逸興寫雕章於長謠述妍辭於流詠維此四物無一則  
病公子亦有之乎曰登高能賦昔人所善雖匪大夫敢  
不强勉文室之美備之久矣丈人曰檠楮如錦生於荆  
山豐末之角產彼幽薊三均六良往來有體董澤之叢  
東南之美金鏃石砮鵬鷺翎羽和氏騁巧工倕運伎檠  
合矯殺以為弧矢鳴鏑朱絃魚服象弭激若奔星張如  
流水射遠則超忽中深則披靡春氣微和可以張弛貫  
楊葉於脩埒破采侯於高時仰虛落於孤鴻傍得雋於

雙雉侑賓俎之甘鮮啟瓠犀之皓齒公子有之乎曰桑  
弧蓬矢赤子之訓依仁游藝前聖所傳僕無負薪之憂  
寧敢有缺於斯器丈人曰良金之壺脩徑有度矢以柘

棘物因其故制之用扶

按二語用禮記投壺籌室中五扶堂上七扶庭中九扶孔穎達

疏四指曰扶原本作符誤

堂室異數侑以貍首之樂節以魯薛之鼓

既慶馬而告賢斯有懲於不武可以肄禮於燕射可以  
侑樂於賓主公子有之乎曰文物之制戴經所記祭遵  
軍中猶用不廢哨枉之具亦有之矣丈人曰裊裊之增

加以繁弱一蠶所吐聯以為繁凌虛縟於游絲乘風輕  
於遺籜籊籊荆條絲絲緒屈芒針以為鈎屑芳桂以  
為餌規輕輪於盈鳧式卷舒於弱縷蒲苴得之以聯鴻  
鵠詹何習之以制鱸鮪下逸翮於高雲出潛鱗於淵水  
乍應響以星隕或翻波而錦綵既俯仰而有觀亦殊甘  
而擅旨公子有之乎曰弋鳧與鴈風人所美桐江磻溪  
有嚴有呂禽漁之器亦嘗具矣丈人曰文楸之枰青石  
之局縱橫歧道錯落金碧綴象犀以為比琢員玉之黑

白呼巢叱盧三行五格華巾揮拂手敏心愜味陶唐之  
遺制揆奕秋之良策輕陳郡之十萬掩東府之一擲可  
以忘憂可以永日酒闌樂闋賞心未適太昊司晨而方  
舒羲和鞭日而未夕以侑樽俎以宴賓客公子有之乎  
曰張而不弛道非文武猶賢之訓聞之夫子奕者雖非  
所嗜則亦有其物矣丈人曰公子春服既成舟車云具  
有禮有樂既文既武弋釣碁博亦習之素斯可以窮勝  
賞於人境之表極餘樂於名教之內縱目力以遐覲偶

尤絕而無愧真芳蹊之佳客樂遊之奇侶此吾宿昔願  
得與之周旋者也子歸而嚴子之具矣吾今載脂載牽  
請為子先矣公子曰唯唯於是廼避席逡巡再拜受賜



欽定四庫全書

雲溪居士集卷二

宋 華鎮 撰

古體詩

四言二十五首

神功盛德詩

神州推美也藝祖太宗宣祖之子太平之業  
創於二后故推以歸美焉

茫茫神州有疆有理殲殄豺虎翦夷荆杞人可以羣神  
獲其祀惟宣祖是畀

道有倫極克建克叙不喪厥猷物有其紀既汙者隆何  
千萬年施于孫子惟宣祖所畀

其畀惟何篤生真人作之孔武敏則有神廼聖嗣德益  
之以文慶既令矣克成厥勲

神州三章一章七句二章章八句

於皇受命也藝祖以神武受天休命開太平  
之基焉

於皇武王帝錫其猷克奮神武應天之求維睠乃顧申



命用休獄訟謳歌旁來不謀高視虞夏嗣于有周

蠢爾小腆昧天之靈弗念厥顯首干我經龍旂東指淮  
海惟清西狩三城澤路以平皇皇天聲如雷如霆罔不  
震驚

偏師四指露檄旁招負固銜壁知幾造朝凌江絕嶺曾  
不崇朝蜀道失險關烽聿銷

恢恢皇綱周漢之後唐嗣不武實弛其紐自我維之律  
此羣醜式相上帝以奠九有

於皇四章一章十句一章十一句二章章  
八句

亨龍定功也太宗佐佑藝祖應天順人盛德  
升聞復受厥命克成帝王之功焉

瞻彼亨龍應時而作維雲維雷以引以翼大人有徽音  
物被其澤德馨孔昭休命爰錫

蕞爾汾晉穢我王路天誅久稽爰赫斯怒大明繼昭晞  
彼朝露文軌攸同平平天步

朱干瑊戈包以虎皮脫劍解冑敦說書詩鍾鼓喤喤俎  
豆儀儀相我斯成以永丕基

亨龍三章章八句

猗歟體道也章聖莅天下無為而成體至道  
之用焉

猗歟道真厥心希微我則道之萬物紛錯我攝之以無  
為股肱良矣心膂則奇蕩蕩妙用民莫之知既綏寰中  
亦靜四夷承休垂裕維君維師

雍雍和聲召彼協氣散為豐年凝為嘉瑞三脊之茅四海之美惟帝王是致

巖巖太山升于天中鸞輿戾止玉檢金封汾睢千里親飛六龍上下昭報神明以通

在昔圖書出于河洛有龍有龜前聖之作惟天無親德侔斯格我躬受之寶符神策

猗歟四章一章十三句一章七句二章章

八句

惟天保民也仁祖有盛德協于上帝能保惠  
于庶民增大先人之功焉

上天之載引之惟逸原民之生天子之職我安其止弗  
擾弗刻厥德罔愆宜符帝則

我征既寬我役不煩息我干矛審爾刑寬井飲田食日  
舒以閑鴻化何為淳風載還

俾爾息而庶俾爾厚而富黃髮稚齒既仁且壽帝歆其  
馨介我純祐

其祐維何如商之戊天地其行既長且久寵綏下民克  
念厥後取我元良錫之九有不失其傳益羨三后惟堯  
舜為難惟我則不

惟天四章二章章八句一章六句一章十  
二句

德淵有慶也英皇起維城之地毓明德而陟  
寶位見世積之慶焉

世德之淵慶流瀾瀾篤生哲后在宗之子其積彌新有

聞不已文考受之以肖以似人之攸歸天命爰止

天命靡常惟德惟功神聖有作歷數在躬正位東朝遂  
成大宗協和萬邦萬邦以雍

沈沈神機其動其時和柔以剛克愛以威肅之振之俾  
無或隳功則未既思有宏規

德淵三章一章十句二章章八句

皇猷復古也神考體非常之畧篤見古道能  
底不世之功焉

皇有大猷其成落落文武不世千載無作聖人勃興積  
厚施博作之新之以底遠畧

既發我明既達我聰合變體經神化無窮長毓儒雅蓄  
礪兵戎無思不服物有其容夙夜不怠濟我豐功

濟濟朝廷有名有實多士在服百工勵翼禮樂興矣刑  
政既達郁乎有文紹周之則

絛綿句麗

按通典高麗本名句麗以高為氏後漢書作高句驪魏志唐書皆作高句麗

莽莽

河湟絕彼東海逸于西疆或翦或懷德威孔揚列我郡



縣襲我衣裳于前人有光

皇猷四章二章章八句一章十句一章九句



欽定四庫全書

雲溪居士集卷三

宋 華鎮 撰

古體詩 五言三十首

詠古十六首

衮衣自美好無能被猿猱鷓鴣巢魯門惻愴臨九牢此  
物乃異類珍華宜見逃潁陽本無人嗜好非羽毛執心  
一何苦用形一何勞采薇代芻豢芻豢氣膾臊飲水寧  
手掬瓢風聲怒號不慕黃屋尊遺之如秋毫道真固所

重無乃太囂囂達士各有心非志斯鬱陶飲河已盈腹  
河流自滔滔一枝儻可棲雲構如蓬蒿適外皆長物逐  
物非吾曹如何市朝人捐生競錐刀顏川無回波始覺  
素風高

穆王有天下王綱正齊肅玉帛來萬邦明堂覆重屋珠  
金嚴器皿龍章粲華服玉戚副朱干英莖薦清曲窈窕  
備嬪御芳顏美如玉文章窮制作采色已繁縟晚與化  
人遊清都暫經目夢回顧人世愴恨情不足九重深且

嚴視若窘羈束腐朽視玉石臙惡生膏沐倏起駕八駿  
凌飛厲黃鵠遠尋西王母高宴崑山麓歸來九廟荒日  
暮歌黃竹

黃河天上來一曲一千里馮夷值海若反顧忘秋水通  
川不足多支流寧復紀大樸久已喪羣言亂如麻儒墨  
及刑名交流自名家曲士殉所察紛紛摘其華伯陽究  
宗本為言天地初蟪蛄驚春秋格言落玄虛華顛困章  
句強識家人書

長劍寄寶匣往往夜鳴吼芒針補弊履雖賤不為醜藏  
器貴有施斯人自吾偶汲汲出疆贄皇皇喪家狗無愧  
三宿行未多沮溺耦營丘執羔客乃是射鉤手解縛履  
文陞低顏亦含垢魯堂品藻中茂實帝王後君子當際  
會所學問行否南陽三顧日不羨商巖叟相期等釣璜  
茲為兆熊后宿將輕少年前席亦何有恢恢王景畧落  
落秦關右周旋二十年初心了無負何必逐桓溫聯翩  
東南走松栢儻莫依嵩岱皆培塿

昔在戰國時吳生固多奇弱魯偶以將彊齊不能支聿  
來守西河縱橫各有施黔首樂無貳財用日以滋士卒  
思致命官事咸允釐韓趙既來賓秦人怯東窺魏郊昔  
多壘中外安且熙當時計其功誰復相等夷盛德乃不  
器中智各有宜由來東國鈞不類提軍綏論列謾紛錯  
至當難重違桓桓蓋世氣低徊下卑辭

風雲起幽朔霜雪彫松桂修竹實不華猗梧慘憔悴江  
漢凝以沍醴泉更蒙蔽鸞鳳何所歸增擊真良計岐山

盡禾黍九成困憊憑鳴矣後佳期來儀爽幽契烏鳶競  
腐鼠仰視驚高逝衆羽亦可懷雲飛屢回睨猗嗟魯先  
生生後唐虞際高華雖韡韡碩果終幽翳幅紙下聊城

片言挫秦銳銛銛釋紛難未足論明哲

按哲讀去聲音制傳元祀景帝

登歌執競景皇克明克哲旁作穆穆惟祗惟畏

況復歷下談微端本柔脆時無

豪傑士橫議喧鵠鵠

按鵠本音決爾雅鵠鵠鵠鵠是也鵠鵠即鵠鵠集韻涓惠切音桂本

作鵠考離騷恐鵠鵠之先鳴兮王逸注一名買鵠揚雄反騷恐鵠鵠之將鳴兮顏師古注鵠鵠一名買鵠一名子規一名杜鵑常以立夏鳴則衆芳歇而農事興此入霽韻正依集韻音桂也

春冰薄輕綃可



耐秋陽斐

黍稷無惡種方苞藉良農淳化混無外殊疆藹同風海  
濱昔未洽盜弄潢池中勝殘無善政矧日勞兵戎龔叟  
達事變嘉言契清衷鈇鎖何所施鉤鉏日成功鷄豚被  
封域桑麻翳垣墉天子念循良召對明光宮醉客雅輕  
事臨歧願追從厚意難重違歸軒相與同終藉哲人語  
清風俸淵冲小人徇其末所得竟無庸君子喻其大道  
義在所攻聯裾治水衡遲暮何從容

鮒魚在涸轍所志斗升水斗升不可得安望長江鯉朝  
登禹門浪回首風雷起高才忽細行脫略外譏毀鄉閭  
不見容縣令邈難邇悠然挹斗酒西遊咸陽市一言悟  
時主傾注超園綺獻納無間言經綸有餘美平步躡雲  
漢瞬息致千里賈生終如遺資用豈不偉

三聖贊拔茅拔茅有連茹四始詠鳴鹿鳴鹿嘯其類性  
理儻可賞微物在所貴矧伊人倫秀德輶自勤致昔在  
世宗時炎劉正昌熾蒲輪聘枚叟異人始膺至鄭生何

慷慨稱薦天下士嘉言美且閑咀之有餘味當朝尚趨  
和浮沈在承意囊括未足多似忝司農位獨以推轂賢  
千秋仰高義周公親吐握事與田竇異如何大將軍碌  
碌無所譽功業雖可名風流固多愧

吾愛袁東陽才華自天性注射溢飛泉玲瓏韻鳴磬微  
吟傍牛渚傾寫江州聽珠聯麟野韻響答臨歧贈倉卒  
宣城辭顛沛長沙詠辭林騁高步聲華既明盛不為桓  
公屈高風更嚴勁榮路何足論清裏自如瑩

興平昔喪亂射狼恣吞攫雄才卧南陽盤桓寄雲壑良  
玉沽善價高情無適莫風雲時會合約束非縲索蕭公  
鎮關中守固惟筦鑰韓彭冒鳴鏑閫內非所度成都偏  
仄地草昧事叅錯顧盼乾坤靜談笑風霆作東連紫髯  
公北設渭濱略靈源挹愈盈英風際寥廓明知不自假  
高談貴無忤宿昔何所侔夷吾暨燕樂

窳窳當九門西山寶騶虞鴟鵂集上林丹穴巢鵲雛姦  
雄始基構哲人晦良圖步兵偶叔末整轡登蓬壺身世

委杯酒不以禮法拘長嘯引鳴鳳新詩綴驪珠慷慨臨  
廣武感激慟窮途所志豈方外林下薄踟躕恢恢大雅  
人矯矯真龍駒寧愧蘇門士臨刑據槁梧

秋陽鑠金石康莊晝如焚乘軒及負荷累足朝市門揮  
汗散凌雨騰埃播長雲隋珠彈黃雀貴賤誰復論安知  
北窓下乃有羲皇人高卧挹清風翛然遠世紛綠琴寂  
繁奏白醅漉綸巾井水患甘旨膏蘭困明芬何用結廬  
地喧填走車輪

唐昔先天後天步復清平君王圖治定槐棘來羣英渭  
水亦投竿萃原猶棄耕丈夫敦志尚不為軒冕輕矯矯  
同州守素風獨崢嶸慷慨論十事激切觀王明獻納無  
迂言始來歆大烹富貴豈不念直道思有行馭者信所  
學不為嬖奚更況當東國鈞見利難自傾行已或可枉  
乘軒何所榮風虎既相從雲雷底光亨開元及貞觀當  
日乃懸衡至今夸毗人聞風心骨驚

高柳何葱蒨弱弱章臺端眉葉蔭紫極條絲拂朱欄何

以謝松竹撓弱慙歲寒既乏貞固姿枝葉何足觀小人  
殉利慙俛仰如轉丸苟非社稷臣禍患寧肯干蒲山已  
歸覲黎陽尚盤桓當時方寸地明明赤如丹颺舉冠凌  
煙騰芳臭如蘭一言失其所功名兩彫殘高帝論平陽  
劉氏終以安英公負文皇武氏為世患無忌問趙相侯  
羸起長歎白首不可保知人良獨難

蘭芷生幽薄浥露褰華姿芙蓉隔秋江扁舟滿江湄丈  
夫抱材用但願君王知甯生擊牛角載歌南山詞詞終

脫袷褐纓佩暮姜蕤人事非有定斯言或難持翩翩李  
將軍鳴弦壓由基餘威震戎虜談笑靜邊陲桃李曾無  
言嘉聲滿黃扉心知堪萬戶乃謂生匪時烽火照甘泉  
未能包虎皮目視漢飛將棄棄輕如遺頗牧已黃土忉  
忉勤緬思如何中林士坐視青雲期

古風

瞻彼南山下溝塍蔚相續泉流既清美土壤膏且沃巖  
壑雲氣多時雨常霑足苦乏知人術所寄非良淑樹藝



本末工營私一何速鉋鐸

按詩周頌序乃錢鐸傳鐸鐸也疏云或作耨字詁云頭長

六寸柄長一尺鐸古字也今作耨

不及時終然廢種耨嘗恐歲云暮蟋蟀

鳴我屋良苗不可見何以望嘉穀

### 讀孟東野懊惱詩

東野不解事強為懊惱詞惡詩皆得官舉世不及嗤好  
詩空抱山寂寞無人知詩自有好惡得官不在詩白面  
無伎能青雲多路歧君無一囊錢姻婭復為誰且保珪  
玉質無使傷磷緇文章古所貴恐非涉世資羽翼聖道

術收拾古佚遺此外不可倚倚文諒多奇

小院

小院無經過虛庭窈深幽高堂晝晴永朱箔上銀鈎文

砌桐花落碧瓦煙光流交疏靜丹綺飛梁架青虬

原注一作

回風楚罷夢疑塵寂其謳流鶯自覲睨好音暫遲留

早發蕪湖風便舟中有感

長波西南驚高風激江流掛席向浦溆凌虛駕輕舟洲渚亂揮霍蒹葭颭颭颭重山捷飛過疊浪紛悠悠鳬鷺

不及辨頻咤越飛鷗舟人擊鼓吹謔浪相賡酬調笑西  
來人掩淚寒沙頭人聞此語樂我聞此言憂爾速非爾  
巧彼淹豈其尤淹速偶所值矜笑徒自偷況余涉世途  
泰稀否常稠此日雖偶駛來日恐或不駛也儻可矜留  
滯還增羞天道雅無常非分非所求但願日日行行路  
無阻修

汎舟

汎舟涉長川舟巨川且廣操榜無良師東西逐波蕩左

之蕉葦多右之洲渚枉中有安流道可以詣所往不習  
昧其從終日勞蕩槳蕩槳勞尚可所憂波濤長黑雲蔽  
白日驚颺摧五兩沈浮何足道形生在反掌豈無觴深  
人疎絕不得賞

題竹軒詩

歲寒青松青落落惟修竹烟葉舒青翠風莖戛蒼玉高  
標契嘉士暫挹情已足况復清陰中耿耿有華屋屋下  
富經史塤簫韻方睦啄食日已肥文綵更繁縟側聆簫

韶奏聯翩赴清曲秋色正蕭疎庭宇清以肅且復遠修  
林采采黃金菊莫學山陽客顛倒困醺醖

贈別新渭府機宜蔡二同年

賈生流落處寒日照山郭江湖行欲盡客意正寂寞  
擊逢蔡侯舊交宛不若立談露底裏貞意銷垠堦握手  
笑登舟杯盤已紛錯初言叙交契次問何漂泊苦道行  
路長春陵亦堯堦仲冬纔薄寒秋水雖已落湘山尚重  
疊湘水亦浩漠水深莫暮止路遠宜晨作委曲話津途

纖悉指棲托前修共科名分義曾不薄此道久淪替後  
生多落莫頌君古人風不為一杯酌我舟尚南邁君馬  
方西躍各指天一涯何以慰離索平涼古名鎮扼控開  
戎幕綠髮照青衫從容預經畧從軍古所貴清世尤多  
樂已見六翮修行看上遼廓

宿道林寺詩

鉦鼓遠轟填旌旗近凌亂蘭棹截波蟻肩輿傍山轉白  
羽映塵舉烏紗倚風岸揆才非阿都託乘陪中散瞑投

蕭寺迴路入修林  
清談曾未既長夜已踰半周旋仰  
陂量眇眇慙溝斷欲倚青雲披輕歌白石爛高風生夜  
壑長松響幽澗秉燭訪陳跡辭墨疊壯觀纓綈雖未濯  
心目欣已浣文奇楚招些跡異元郎漫初驚冰玉違已  
見珠璣璨臨池名草聖天台得才冠兼資古所稀荐遇  
世尤願琳琅鼓餘韻蛟蚪走芳翰詣絕雅無倫神變敏  
如幻規為到古始氣槩起消悞須知趙璧貴祗借秦人  
玩吟想情有餘言終屢增歎

汲水詩

汲水苦綆短低回就清淺綆短儻有續重淵良不遠清  
淺本無源其涸易見硯重淵酌愈出流波被溝畎膏肓  
苟願治會須即俞扁所之在萬里庸可策驚蹇白茅滿  
原隰刈之何不勉緝索統乃長單極恣舒卷寄聲汲引  
者功微利亦鮮

虛室

軒前列羣山軒後得虛室宛若成都居枵然惟四壁清



明照牕牖不待秋月色萬籟悄無聲終年飽岑寂

頤軒詩

土木謝瑤華結構趣閑敞四座來風月中庭容几杖庭  
喧海潮至牕瞑山雲上蕭散寄官曹欣茲會清賞

寶墨堂

原注堂在新  
安縣舍後圃

堂有顏公石辭墨真世寶圓潤屈銀鈎淳華挾春藻忠  
義昔所服文藝久彌好至今有識人撫卷惜元老

廣述二首

茫茫太行道日側獻彫虎天明落檻穽迥失山林阻搖  
尾仰視人意態已如鼠烏鵲竟何為俛喙噪而聚高明  
人共畏鰥寡世所侮丈夫氣如霜所貴摧強禦埋輪斥  
豺狼不待梁冀死長孺戒李息張湯方遇主古人恥低  
徊吐茹兩不武真節一朝奮千載羞莽鹵茲人不可見  
茲事乃近古三復清風詩永懷仲山甫

飄風入閭闔九陌起黃埃馭選振鳴珂馳驅東西來側  
足湊高明珠箔為褰開附會崇岳友沮譽牛李儕傾側

競娑媚談笑足詆諧朝為道旁客暮為廊廟才如何首  
陽人悵望黃金臺所得竟斗筭回首良可哀安見鄭子  
真谷口日徘徊嘉聲滿朝野何用苦自媒





欽定四庫全書

集部

雲溪居士集卷四

五

詳校官庶吉士臣吳烜

侍讀臣孫球覆勘

謄錄監生臣陳遂

欽定四庫全書

雲溪居士集卷四

宋 華鎮 撰

古體詩 五言 二十七首

春日雜興十五首

李冬歲云暮玄冥肅寒威濃雲蔽白日朔風戾天飛霜  
華晝不消木冰粲瓊枝河漢凝以沍松竹慘萎蕤豺虎  
有飢色况乃孤兔微朝陽汎春光黃雀鳴華棖

鳴禽斷殘夢寒衾有餘溫褰帷覽東窓朝陽汎晴曦晨

興不知倦攝衣步南軒碧瓦無寒霜芳露浥蘭蓀東風  
苦未競愁見陰雲屯登高遠四望極目際郊原

三眠愁夜久夙興坐高堂是時大火中啓明在東方曉  
月俯前楹列星掩微芒和風從東來草木有流芳欄花  
浥零露密影森低昂咸池浴朝日照耀上扶桑輕煙靄  
簾櫳盈盈斂餘光

韶光入南園芳樹轉珍禽弄月曉煙際吟風夕陽林間  
關調巧言玲瓏韻鳴琴密傳青帝意說盡陽和心採之

芳林幽置之華堂深願言几席間時聽林中音朝餐屑  
崑玉彫籠飾南金引盼結綺疏弄影高梧陰三旬春欲  
暮寫此如簧吟

緩步出東門徘徊高城隅芳郊曉煙霽極目眺平湖遲  
日暖潛魚東風汎菰蒲陽和著萬物動植皆昭蘇行樂  
貴及時流光易云徂五陵少年客燕趙傾城姝憧憧滿  
金隄盈盈雜簪裾華龍儼上駟冰雪瑩膚腴帷花啓芳  
筵藉草羅樽壺蹇條密相遺巧笑情有餘溱洧宛未妍



桑中良不如

東風入九門細草有餘綠長楊散金縷繚亂青樓曲  
絳桃美於錦素馨純如玉名園搜未盡春華已盈目  
蘭蕙有天香乃在山之麓不與東風發誰知顧中谷

姜庸曉相攜採桑高城東新粧競姚冶危鬟較攏鬆  
桂襦無舊製組繡有餘工穿林逐流鶯遵渚學驚鴻  
密葉朝露晞遠揚戾東風日昃蠶已飢采采不盈籠

虛懷湛秋水拳石枕寒沙上栽九節蒲依倚復歌斜寄

懷曲几穩發秀終年嘉細根散蒼髯巨枳蟠青蛇玉篴  
瑩故葉劍鋌長新芽融怡謝陽光滋澤非露華潔貞宛  
相適吹噓曾不賒乃知元氣游脗合大道涯生生無間  
斷在在均邇遐陰陽有異稟朗應無爾差故茲靈藥材  
見重長年家寧如溱洧贈復異洛陽花臭腐薦高腴天  
冶揚芬葩栽培劇彫楮祖謝迅飛霞韶光瞬息移不得  
延豪奢

東郊接南陌芳樹繚脩隄疎雨斂輕埃十里平如坻雲

日弄晴陰煙花淡低迷往來多騷裊躑躅赴東西紫騮  
連錢花青驄碧玉蹄軒頭剝秋兔濶臆竦鳴雞金鑣響  
玲瓏玉校光高低促韁合組繡脩策琢玻璃顧影歛逸  
足迎風鬱長嘶不逢王武子與解錦障泥

晴春厭密處駕言出林坳捨車步衡皋緩帶遵蘭汀長  
林合葱蒨綠陰透虛明上有遷谷鶯下聞求友聲風和  
黃舌穩薄暮耳猶傾歸輶俯俄景脩路尚安行華鋪閉  
深院嘉樹列前庭高梧陰綺窓媚柳拂朱甍安得谷中

侶晨昏此飛鳴

迢遞長江表崎嶇青障間  
瑞草雜野卉吐秀莫窮看  
馥郁誰與竒細碎如等閒  
荆榛共榮悴樵牧幾摧殘  
殊鄉採嘉聲千里輶名園輕舟走彫檻  
文砌薦朱欄芳華未盈枝  
傾都已酖顏疎叢乏蔥蒨  
薄采媿朱殷珍賞占芳時  
野客更舊觀試問蜂和蝶  
何如蕙與蘭

江梅燦瑤琨緒風未成和  
紅藥簇雲錦韶光已蹉跎  
臘寒苦難任秋陽暴如何  
寧知桃李樹乘春蔚娑娑  
二月

艷陽天兩京佳麗多五陵浮瑞氣三州翻綠波宮槐出  
華闕御柳夾銀河玄鳥雜飛舞黃鸝競鳴歌芳蹊展平  
練繁艷簇香羅浥露笑金谷迎風媚銅駝落英縱紛紛  
珍實已戕戕莫訝潘河陽盈城意靡他

纖纖蘭蕙甲青青楊柳絲草木有春華園林競芳時粧  
點貴銓次高下有推移連畛已端修茅蹊盡平治雕欄  
被丹雘文甃合瑠璃穿薄啓縈迂拍隄汎漣漪安排紅  
藥樹映帶牡丹枝蔓草既誅鋤秋榮亦芟夷碧蘆斷修

幹丹蓼剪芳蕤苞杞散不收叢菊葉如遺蘆蓼尚云可  
杞菊或未宜神功著西河嘉聲藹東籬朱實照金鼎黃  
華登玉卮暄涼雖異序榮秀各有期商飈掠春叢摧折  
誰能支

春華雜丹素芳心馥椒蘭蝴蝶採其榮交飛密為團輕  
鬚卷絲緒弱翅翦冰紈栩栩婉有容飛飛閑可觀深叢  
密依倚曲徑恣盤桓日昃芳氣消露晞黃粉乾繁華未  
零落幽意已闌珊

中和嘉會日名都肆廣筵華榱陰簪裾樽俎森盈前主  
賓興方諧威儀曾未愆鳳簫密銀黃瑤琴掩朱弦衆優  
湊廣庭跼蹐迴旋被服倂古製咿嗚操方言鉦鼙雜  
鳴擊促數競喧填歌舞養心耳心耳今煩悵恐非君子  
音不足延永年

和孫秀才醉中二首

封人祝多子患寡不患小林慮行且歌自喜身已老五  
月日可畏不踐門前道北窓足虛閑清風颺然到況有

樽中物玉山恣傾倒  
黃河或可斷  
世事未云了

吾鄰有達士時得問話  
言寄身杯酒間  
萬事不復論  
大嚼青精飯  
高岸白綸巾  
愧非伯倫伴  
辜此羲軒民

瀑布

蒼崖入青冥飛泉下巖頂  
薄風春雷怒照月秋練迴  
清潤冷書幌輕柔媚  
茶鼎揮弄自忘歸  
賞心意誰並

橫山

戶外片山橫長蛇勢繚繞  
林疎無鷲獸海近多鷗鳥  
雲



氣弄晴陰煙光媚昏曉坐中見樵采隱隱下林杪

懷嵩亭

原注亭在新安縣舍後山

嵩高維神嶽峻極上霄漢臨登信舍地庶入朝夕觀垂  
簷碧雲低帶戶前山亂何日見愚公神棲夢輕斷

適南亭

子真埋照地千載委榛莽知音久未會遺蹤寂誰賞華  
堂始基搆皂蓋日來徃高風邈已遠茲焉競長想

河南運使柯少卿用廣西提刑曹司勲遊嶽麓

寺韻送廣西行俾令同賦

昔聞湘西寺夢想投雙脚身境隔楚越攘臂無由攫此  
日陪勝集當年意彌廓山環秀色遠地勝真興託赤日  
朗泥金彤霞煥塗牖追隨得後乘登頓閑芒屨窮幽際  
高深歷險遵厓壑北斗近在手南溟消一酌天風韻球  
琳世味羶醴酪躡屐想王謝登舟成李郭欣戚起參差  
去住同紛錯常時惜聚散靈襟費恢拓契理在相忘言  
志亦盍各無然結惆悵聊用聆談喙况當擁斧繡不類

居榛壑金石雖欲流風雲正相薄  
薜華夕則隕蠟味淡可嚼照坐蘭玉明  
揮翰珠璣落青嶂繚雲構紅紗羅蠟燭  
景勝語難工杀毫幾頻閣

早發京口舟中

解維去北固挂席指西湘  
秋江迴以朗物色見毫芒蓬窓列遠岫  
天際揔連檣鷗鷺簇寒沙蒹葭肅初霜  
千里伊此始扁舟前路長  
路長念行遲家遠情難忘回首東南  
引朝陽汎滄涼稽山不可見况復梓與桑  
日月無停

晷星漢迭回光人生天宇間安得戀故鄉徒勞非所願  
薄言奉高堂念昔楚與越相望若參商山川有分守出  
入多譏防道泰共家國路夷關關梁勉從四方事及此  
筋力强羈宦真飛蓬飄颻隨風翔遠近不自我東西竟  
何常君子貴知命世路各有方

巫山神女詩

巫娥美無度綽約姑射倫冰雪照肌骨被服丹霞裙蘭  
膏皆臭腐天香有清芬手提瑤華枝乘鸞弄氤氲緬邈

相光彩杳然喪塵紛楚王夢見之三歲情如醺伊人竟  
何許宛在陽臺下宋生未見稱朝暮白雲雨

襄陽道中望鹿門山

龐公昔避世全家入翠微空遣山下路不知今是非高  
風久寂寥世路誰與歸山頭日欲落搔首重依依

采石

夜暗梟孤響天明蛟蜃伏君子貴知幾乘時介多福中  
原昔不競淮海波濤颯高視孫仲謀雄心冀前躅大明

將昇騰氛祲先驅逐周師東南指淮蒞歸亭毒遺爐倚  
江流熒熒怯風燭真人方遠畧墜緒勞君續後至祇取  
羞先迷庶能復時雨動民望遠猷走辰告密筭結浮梁  
長驅踐平陸敵氣沮飛渡軍勢乘破竹鱗羽不及張巢  
窟駭傾覆百年厓石稜鐫刻猶在目風濤杳不作水落  
秋山足留興釣魚舟穿維宛相屬由來一帶水未勝長  
城曲道梗叛或易時清去還速何必鑿秦淮佳氣自消  
縮

銅陵阻風

常言秋冬交沂江便風多我行已旬餘有風不生波直  
道不敢往曲港傷遠迤昨日始張帆騰凌越盤渦脩途  
驛未歷寒日景已俄夜半轉巨橐驚濤擁蛟鼉天明更  
雄厲尋尺不得過密雨喜初霽整衣起婆娑倚檣玩輕  
鷗遵渚踏寒莎羨望東行舟飛帆峭嵯峨回數挽引日  
多少唯與阿行止風在天天為謂之何欲歎翻自笑聊  
為阻風歌來日如未已且用資吟哦

欽定四庫全書

雲溪居士集卷五

宋 華鎮 撰

古體詩七言十四首

書李西臺詩帖

古來論書如論馬不看皮毛看筋骨赤驥雖瘦神彩駿  
骨筋強奇氣突兀點畫筋骨生筆端昔人小伎不自忽  
用筆臨紙如用兵敵陣深攻橫馳突水墨淋漓無顧藉  
鋒毫來往輕陵捩阜鵬蒼隼搏秋天老蜃長蛟結幽窟



李唐末年天下亂劍戟縱橫文藝缺鍾王遺法散不傳  
二百年來更蕪沒臥豪側管不到紙孤渡春冰輕窻窳  
尋蹤貌影見形似坐擬前人己超越禿盡南山千兔毫  
妙絕曾無一毛髮西臺老李得古意揮洒工夫通恍惚  
昔間己覺心思啓今見頓使蒙蔽發縹緲欲卷更復開  
明發臨風到華月

次韻和湖南運判司勳曹公衡山行

大山隱隱橫如衡北與常嶽當天經發竒吐怪無時停

旦暮生氣凝紫青  
隆隆翠光照南溟  
是為朱陵赤帝庭  
奇峯八九羅明星  
真仙宴集通層城  
飛樓疊閣到絕頂  
環回照映真雲屏  
流泉夜逐銀河傾  
危石上與撐機撐  
輕輿飛蓋不知峻  
來往常見林梢盈  
炳靈彌世動宸扆  
儀物嚴奉侔朝廷  
天章國寶萃神異  
金華墨彩光崢嶸  
提封奄有神仙宅  
星軺部按經雲扃  
傳經俯可拾青紫  
攜華早合登蓬瀛  
肯跨蘇耽嶺頭鶴  
輕逐浮丘吹玉笙  
暫將勝具擬玄度  
行與大帝調六英  
漢庭已當思汲黯

紫垣歸次光晶熒尋源況曾到雞足根塵洗盡丹臺靈  
宰官應世通有誠飛雲何意超鴻冥玄珠不獨罔象得  
白雪一點洪鑪生詩豪墨妙天許并雲崖蘇壁增新銘  
紫虛羽蓋飄玲峴湘源寶瑟鳴蘭汀蛾眉旋顧若自失  
霜威一肅春華零琴高睥睨不敢請遺鯉失步奔長鯨  
平反犴獄成虛囹姦豪斂社無辜寧隨車靄靄留餘馨  
千里卷盡重雲暝威形不習西門豹襟風遠析湘人醒  
自憐匏繫致身誤遲日坐費三春晴况無氛翳動精稭

照乘惟有仙花明日邊應許留姓名雲車未間相逢迎  
花源深處尋遺氓枕泉漱石窮幽清拂掠朱鸞毛羽輕  
朗聽日轂聲鉤鉤誰知信舍遠千里胷中浩氣高難平  
翰林一想天姥起當年飛夢三更成便欲登臨雲頂寺  
俯看練帶瀟湘橫驚聞佳句得交珮傳寫寶祕勝韋羸  
清新自是文章伯飛譽高華由妙齡美如時雨恣飛洒  
有聲着物皆欣聽河流萬里勢不息曲折細可為章程  
大匠斤斧何經營良賈厚藏非力耕鋒鋌鋳利新發硎

文彩繁縟森華纓洗心吟玩曾未再已覺兩腋生羽翎  
千巖萬壑句中盡此身如在衡山行

雲溪行

按紹興府志會稽縣志皆無所謂雲溪者考若耶溪亦名五雲溪唐徐浩遊此

歎曰曾子不居勝母之里吾豈遊若耶之溪遂改其名疑雲溪即五雲溪也

雲溪發源自雲門千古流注越山根城金河玉雖已遠  
南來波浪長崩奔蒼崖峭壁三十里翠煙紫霧籠寒水  
往來鷗鷺逐波頭出没魚龍穿石齒清時有客寄扁舟  
長嘯日來溪上遊緩教霜翮追清曲漫引輕絲下碧流

有時醉臥閒雙槳不知船逐樵風上  
挹盡千巖曉氣清  
聽我萬壑寒泉響無端側耳鳳凰鳴  
却跨青鸞上玉京  
流連丹桂三秋色辜負寒松半夜聲  
十年南北何擾擾  
咫尺溪頭不成到幾回魂夢似當時  
夢覺尚疑雲滿抱  
今日羈縻江海曲折腰翻為斗升粟  
山頭日落見雲歸  
自怪此身何局促皂雕萬里在一飛  
蛟龍未必藉溝池  
風月好時心似水  
嘯歌聊可解人頤

梅花

當年杜老對梅花曾憶何郎淮海作今日江城歲云暮  
還思杜老歌東閣春風冬雪三百年中間梅花歲歲妍  
清才一往不可見惟有凌寒曉粧面

燈

細風吹雨霑疎幕夜久燈青寒盡落未言金碗沃龍膏  
且免鄰牆旋彫鑿溜川老翁牙齒疎四十始欲披儒衣  
況是雙鬢青絲好不應便作衡門老他年清切許雄飛  
人間萬事隨動順不獨千枝照羅幕廐溷蠟淚當成堆

吾鄉先達少陵後功名爭光臯與伊虛齋一盞半明滅  
賓主清談到明發

叢玉山

按叢玉山在會稽縣東北三十里與石城山相連

山中水石有東巖西巖石徑石峯月峯天柱  
峯交雲峯落星峯仙人峯羅漢峯仙隊峯露  
天池合巖石石臺金櫃峯北巖碧雲峯芙蓉  
峯蓮花峯戲龜峯師子峯金魚峯石鼈龍吟  
峯伏虎石山中亭宇有雙巖亭快覽亭邀月



亭迎暉亭迎仙橋翠筠庵招仙亭晚光亭

石城深沈有神櫝蒼壁青圭森矗矗榛蕪未薙見圓石  
沆瀣初披得叢玉寒流噴薄洗煩慮翠光斂舒瑩人目  
兩巖神化瑣煙霞一逕天成徧厓谷朝陽杲杲亘東嶺  
夕陽亭亭載西陸拄天峻極天為低交雲拔起雲常簇  
風箕雨畢列華藻木客雲娥儼儀服應真示相契空門  
洪厓脫身度塵躅露天池寒星斗簇合巖石暖莓苔綠  
石臺登眺多春容金櫃絨封富奇蓄幽竇懸泉歲清淺

碧嵐如雲日紛郁蓮花風度夏香深芙蓉露裛秋華肅  
靈龜戲游物自壽師子雄騰誰與逐金魚燭赫待時雨  
石鼇鼉翮依蒼麓滿川雲起老龍吟虛谷風清雕虎伏  
主人天與經綸器才名早在神仙錄清時北闕方我須  
雅興東山難自速脩途未許頃長轡勝地何妨揭華屋  
雙巖挹秀左右逢快覽凭高心眼足夜邀秋月得丹桂  
曉逐冬曦看若木飛梁續徑壓蒼磯投隙團茅繚脩竹  
雲軒芝蓋俯可揖水色天光濃溢掬綠野篇章惜未多

輞川圖畫今能續披圖已覺思超越過眼應忘身跼束  
華編今日許聯詩芳徑何年客秉燭因嗟輕別五雲隱  
長思起效三閭卜分知方外學屠龍不及人間謀刻鵠  
魯國也欣三釜粟梁園倦游還憶蜀葛洪平昔志丹鼎  
子房雅意捐嘉穀願登天路青雲梯長聽仙翁紫芝曲  
徐元立出示李父龍角水壁詩邀予繼作因成  
長篇

龍德神變通盈虛孕育乃與鱗鱮俱被鱗戴角形非無

飛潛食息皆時須太上道德體未刳神物咸萃天王都  
垌林苑囿馴騶虞宮中高閣鳴鵠鷄玄龜負卦洛水隅  
戴因之獸游廣途此時應龍如鷗鳬翔泳宮沼何舒于  
庖犧正位膺乾符是出德水呈神圖彛倫九叙時紛敷  
蒼白紀官各有呼皇風綿邈雖已徂下至虞舜成帝謨  
參御世守職未渝節時飲食如哺烏玄冥失職水正蕪  
物乃坻伏潛天區耳目接識非朝晡疑無驚有無智愚  
葉公好尚俄有孚真物來止還驚吁遺鱗脫角時可俘

世俗往往疑見誣淮上乃有桑門徒曾見得之青草湖  
紺鱗兩葉角一跗坳洼猶見藏泥塗堅質溫潤如荆瑜  
冷光凌亂侵琨珷我疑仙客催盤盂乘興擊破鴛鴦壺  
又似石尉務豪麤醉中敲折青珊瑚此物殊觀惟可娛  
得名非似齊人竽但恨不見真形軀冥飛杳渺何能拘  
昔人市骨求駿駒母在文駟交馳驅靈德況與魑魅殊  
沈潛非為禹鼎模喬岑十疊窮崎嶇鯨波萬里不可逾  
驤騰此地聊踟躕有時亦肯游潢汙悠悠自非真丈夫

無能駕馭登雲衢時注甘雨蘇焦枯六月不用商人雪  
陂杖一擲生頭顱壁梭亦與風雷趨洛浦鳴琴致綃姝  
洞庭吹玉來寸珠豈如蟬螻無肌膚雨餘成象才須臾  
當知鱗角非怪迂聞語無用空揶揄

次韻劉三秀才瑞香二首

南枝碎玉飄溟濛春光次第海天東紫囊夜發香中瑞  
芳蹊不用天桃紅開謝忍從風日下形容聊寄殘毫中  
珠玉交輝色璀璨瑱簾迭奏聲和同園林光價遠莫擬

造化機權疑未公會須折向玉峯去追隨鳴珮搖天風  
玄機冥運依鴻濛執規歲歲來司東乘時剪裁馭大巧  
梢頭幾度鋪青紅匡廬幽香誰見賞直須為瑞芳華中  
餘寒未盡已爛縵似領千花修會同貴名舊尊木芍藥  
第品應許居上公願分靈根徧四海充塞天地皆香風  
道守董公重成冠公樓集宴僚屬因賦長句

九峯翠滴天光曉

原注樓面九疑

日射三川波浩漾

原注瀟沅沱三水會

於樓前

朱門畫戟古城西岑樓新駕長林杪飛藥疊染橫

紛錯重覆交疏深窈窕幕開碧落四垂低屏列好山千  
疊遠臥聽羲馭轉轆轤坐看星車回縹緲歌微動薄  
寥虛樽俎平鋪俯蘿薦耳前燕語得其所目外鵬圖莫  
之天簾翻江日酒霞鮮窓度天風香穗裊平昔萊公此  
棲止目窮佳麗真明瞭雲歸自昔故鄉非日低誰念長  
安杏帝居閭闔深難斗世路風波古彌渺飢烏得食嚇  
鵝雛嫫母在宮憎窈窕干將莫耶不惜折威鳳麒麟恥  
羈擾北瞻曾冠拱辰星南飛却過隨陽鳥彭殤滔滔不



足問榮悴冥冥未宜了沐猴纓弁竟非真明玉在塵終  
自繳百年同氣妬賢守挾隱搜遺思遠紹網羅勝賞得  
偏多懷想高風情不少鯢蟠陳迹久寂寞虹揭畫梁重  
天矯已知青竹播馨香更看華榜延光皎自憐值遇分  
濩落重此登臨思悽悄舉目頻驚五嶺明回頭却顧長  
沙藐局促可能參庾亮清平豈是依劉表楚天不斷故  
關迷危欄倚徧前山小

新開河

淮山畎澮奔東海注作陂池地形改濁水曾無五尺深  
驚濤便欲千尋駭人魚漏網逞宵臆老蚌乘陰弄光彩  
東風吹斷西來流見爾枯虛當可待

如意院井詩二首

太平興國古佛剎小院得名如意輪何人默識原地脉  
鑿井正會甘泉津閤客三尺白銀甕深可二丈青絲縉  
夏涼未覺冰雪冷味美不啻醍醐珍寺僧知愛不忍惜  
汲引無間都城人鳴鐘聲歇更漏促天雞初報扶桑晨

側肩接足負擔者排闥爭湊蒼苔屑絲瓶上下掉孔急  
語笑嘈雜春雷振永日迢迢既云暮健夫噏噏皆嘖呻  
萬人已喜用周給一泓依舊清龠淪

井德本來無得喪居遷乃見井有仁深穿閤甃世不少  
聞名索實多非真潢汙方集已登榦驕陽未久先飛塵  
盈虛既與陰晴變安用華屋床雕銀崇寧元年五六月  
僦居偶在寺井濱曾經畏日曝累朔亦見霖雨傾彌旬  
碧痕澄澄古甃上消長不改蒼龍鱗莫嫌營置近闌闌

莫厭資取多紛綸深院無人轆轤靜焉知此井常清新  
李光道見過贈詩


高槐上拂青天面枝疏不得驚禽戀槐下官曹何冷落  
去馬來牛色多倦春風綠楊暗虛室秋雨蒼苔鎖深院  
三見牆頭梅子花一字不畫塵侵硯宛如太古兩相忘  
况復飛蓋追遊宴有時獨詠西園詩想像清風情眷眷  
門前忽報華軒過邂逅開懷如昔見目擊便嗟相得晚  
更僕清談盡黃卷顧我迂疏何所取似君秀穎迺可羨

少壯應須努力時人間歲月如流電

寄贈永嘉鄭先生

滎陽人物世仍有文雅風流傳已久廣文獨步天寶年  
才名曾在諸公右新詩高陪屈宋遊神翰遠與鍾王偶  
更覺丹青到微妙獨將造化爭妍醜一封入奏蓬萊宮  
三絕題自君王手當時盛事雖云遠今日高風曾未朽  
親逢夫子滄海頭重起清芬百年後倦遊不肯依梁苑  
尚德自甘耕谷口方外聰明已木雞人間事變皆芻狗

子雲寂寞守儋石靖節軒昂遺五斗不試惟令曲藝工  
久幽更覺機神厚詩情渺與江湘迴畫筆能教鬼神走  
論工子建已知親較勝長康未應負所嗟藻鑒閤楚越  
猶使佳名在林藪邂逅雖知近巖壑栖遲尚苦拘塵垢  
明明冰玉長在懷望望煙霞屢驤首何日傾心聽誦詩  
他時洗眼看揮帚狂歌且寄草堂客佳句終慙杜陵叟



欽定四庫全書

集部

雲溪居士集卷六至八

詳校官庶吉士臣吳烜

侍讀臣孫球覆勘

膳錄監生臣陳遂

膳錄監生臣曾照



欽定四庫全書

雲溪居士集卷六

宋 華鎮 撰

古體詩七言十五首

陪和守宴城樓留望江山懷古

歷陽城樓多好風南來和雨飛  
溟濛齊紈四座寂不動  
六月酒面魚鱗紅鈴齋無訟  
日多暇時引大旆摩晴空  
賓來不問禮數隔披襟倚檻  
欣迎逢平蕪不斷楚天闊  
無數好山來望中伊昔重瞳  
顧寰宇八千西渡皆貔虎

叱咤風雲五六年蓋世拔山寧不武力盡江頭已蕭瑟  
秋風未央亦未泰亂世英雄氣頗麤當時還羨紫髯夫  
箭重舟偏徐轉拖舟中賓主亦歡呼龍驤露撓下三峽  
春草不合臨平湖衣帶縈迂寧足倚挑葉渡之勝一葦  
三閣香消春夢殘空傳玉樹江南女人間萬事無妍醜  
過眼紛紛盡芻狗祇有江山似舊時從來却落魚樵手  
懷春悲秋徒自苦浮雲去來我何有鳴絲案竹閒清唱  
當軒更有盈樽酒清時勝日臨高明未愧黃金垂六鈕

永嘉巡檢張侍禁解舍闢洞名黃石

原注國朝孫吳懷直

兵法六韜黃石公素書尉繚子李衛公對問為七書試武士張君之子時中其選

下邳逋客赤松侶興薄雲天寄廛市五世鳴鐘不自矜  
肯向人前進遺履素靈將傾赤精奮羽翼當資天下士  
夜半慙慙授素書歷歷商郊阪泉旨西過陳留得沛公  
雲蒸龍躍相因倚剪羸傾項成帝業廟謀勝美皆予起  
漢家明堂窮壯觀楹棟能收真杞梓清塵獨步千載上  
名實誰可繼其美君家緒系出南陽世服戎衣登祿仕

鳳毛益使家聲振新以七書見天子君居无事若山居  
退食小齋日經始茨茅塗土完且潔栽花接果盈階庇  
風月江山散不收標題黃石寧虛爾應懷祖武日自礪  
功名將使旂常紀今日中原久太平頌聲交作干戈止  
南過銅標束帶方玉帛梯航餘萬里惟有祈連及賀蘭  
朝廷未欲知疆理儻推漢幄從衡術定遠將軍何可擬

南嶽僧仲仁墨畫梅花

世人畫梅賦丹粉山僧畫梅勻水墨淺籠深染起高低

烟膠翻在瑤華色寒枝鱗皴節目老似戰高風聲淅瀝  
三芭兩朶筆不煩全開半函如向日疏點粉黃危欲動  
縱掃香須輕有力不待孤根暖氣回分明寫出春消息  
大空聲色本無有宮徵青黃隨世識達人玄覽徹根源  
耳觀目聽縱橫得禪家會見此中意戲弄柔毫移白黑  
佳句慙慙致兩番深情邂逅高雙壁不愁開謝逐東風  
全勝當年隴頭驛

咏西施

浣紗溪上浣紗女野服山花照寒水含顰慘淡不勝愁  
猶使東隣駭西里山鳥淵魚無定識俯見潛逃仰驚起  
矜花睠月春復秋長恐朱顏成暮齒君王掄選入吳宮  
吳宮寂寞無桃李芙蓉一笑君意傾宰嚭言行子胥死  
姑蘇臺榭游麋鹿闔閭城闕生荆杞蛾眉倩盼應自成  
築宮教習胡能美當時掩抑無人顧今日為君除國恥  
君莫怪騷驥鹽車弭耳時誰人不作駕駘比

次韻和劉五秀才重陽不見菊詩

黃花長汎重陽酒今日重陽花未有莫傷節物此時非  
少陵已歎移栽後江梅滿枝春未來紅藥開時春却歸  
春前春後各自得化工無私人莫測明日籬邊金藥黃  
未應埋沒隨風霜高堂滿汎黃金盞相陪何用茱萸囊  
贈別越帥蔡侍郎五十韻并序

某啓某伏覩知府鈐轄侍郎待制新建月堂  
尤得臥龍之勝佳致滿目清宵益竒四時異  
逢賞適無二政成多暇日引賓客登覽東南

之美嘗許疏賤陪侍坐末今當捧檄湖外遠  
違樂郊追想前日樽俎之間樂事美景茫然  
如鈞天夢回無邂逅處雖他年東歸月堂如  
舊而玉音冰質當在具瞻之地杳如天上覓  
難復親謹吟成月堂長句五十韻繕寫呈獻  
雖不足以形容物色冥邈標致聊以達思戀  
無窮之意伏惟台慈特賜省覽幸甚幸甚詩

曰



飛廉鼓橐開氛霧，玉龍盤礴堆蒼岫。雲崖左壁出高墉，  
環回占盡東南秀。高瞻牛女提封閣，下瞰閭閻煙火富。  
紫青巖壑敞屏幃，金碧樓臺錯紋繡。城西半規日欲落，  
天東一縷雲如鏤。人間未覺桂華昇，林梢先見金波溜。  
冰輪冉冉經箕斗，碧落沈沈失星宿。清光不斷萬象呈，  
目極塵寰了無覆。扶桑欲曉天雞唱，玉珮丁東咽殘漏。  
西南松桂碧參差，寒金碎玉高低透。春和三月融青宙，  
紅紫千花簇繁囿。香潔蜂蝶夜不知，暗和清影凝羅袖。

暑雨晚隨虹影斷炎威夜逼餘輝逗南湖拂拂起輕颿  
鑑光千里冰紈皺星流一葉高梧下玉刻千峰晚山瘦  
桂子香凝零露溥兔毫冷咽飛泉漱六花舞絕平川壤  
萬樹玲瓏綴瑩琇凍雲收盡一輪寒光華上下清交鬪  
明眸朗鑒古難偶許謝登臨亦虛覲勝地埋藏祇自竒  
十年林下輸猿狖儒家宗主中郎裔早挾春華甲英毅  
量濶難窮渤澥遠德馨未羨椒蘭臭青雲有路早徊翔  
要津策足頻馳驟旒扆傾衷聆玉振經綸溢耳擬金奏

暫虛法從牧遠民大旆高牙會稽首庖刃從容經肯綮  
鵠卵無勞魯雞伏探幽索隱有餘工逸勝遺竒落精究  
意匠經營誰與相壺中風物真天授霜斧晨開蔽日林  
虹梁晚結飛雲構軒窓四闢洞無物林嶺旁來遠如走  
佳名一字既惟新寶墨八法曾非舊鵲返鸞徊美無度  
龍跳虎臥雄相湊何地通宵得佳致誰人忘寢臨觴豆  
西園物色難重逢秉燭詩詞漫三復華堂有月終年好  
月下樽罍溢醇酎坐今越絕山水佳日添光價高難買

五雲溪上綸竿手誤指王圻攬纓綬畫虎年多愧未成  
屠龍伎巧傷難售清時支離逐斗粟樂國淒涼寄圭竇  
結巢未忍息南枝倚輶何計登華厩片颿隨磔西南邁  
塵滿儒衣色多垢文麗難忘反楚騷魂交尚冀親南狩  
昔人富貴志已得越吟清切傷微疚今人徒勞情若何  
玉壺慷慨臨風叩飛蓋早容陪後乘曳裾屢許登文甃  
煙波滿眼始憑凌談笑回頭難邂逅吳會他年見桑梓  
荆湘數稔色霜袖鳴珂應在白沙隄茆舍徒瞻碧棠茂

萍迹漂漂渺難繫蓬心怪怪紛奚就九疑三五夜晴時  
為想堂前皎如晝

田園四時

春

曉來風信從東轉風中春氣生微暖隴頭殘雪已全銷  
麥苗漸見青青滿土脈膏疏日舒緩鋤犁但覺塍畦短  
桑葉生陰布穀鳴可使流光容易晚

細風吹盡桑黃紫綠暗柔條添旖旎晚來逐伴望林梢

三星便欲當辰已節過清明未云遠碎髮新蠶已盈紙  
遲日融融暖有餘早晚應須候眠起

夏原闕

秋

萬頃秋來雲葉黃瓜田起盡築新場茅簷昨夜微霜下  
天高氣爽風日強明星未上腰鐮去歸路不辭乘月光  
隴頭薄暮片雲起明日晴陰未可量

階頭露草珠盈縷門前促織分明語日午簾帷氣已清

香肌暗喜消殘暑蚊蚋無聲燈火冷已將紈扇歸巾褚  
更長便合促鳴機月白何妨弄砧杵

冬

田家歲事霜飛後五種收成十分有征輸早了吏不來  
柴荆晝掩閒雞狗兒童飽暖歡呼走堂上樽罍湛春酒  
力耕歲晚足餘歡五陵裘馬真遊手

朔風吹水成冰堅風壯水堅白於練霰雪還隨密雨來  
轉眼紛紛滿溝塢陳根凍爛還為土土落田中肥一半

霜鏹去手即須耕敢望東風待冰泮

粉蠟梅梢妝蓓蕾雪晴烏鵲聲零碎蘭堂晝暖浴蠶天  
百果流芳噴寒水春事望春須準擬臨風不惜呵纖指  
寒日頻添繡線長百五光陰已無幾

題桃源圖

枝頭巧語聲高低波光蔥蒨深柔荑烘燼日暖金鱗動  
漁舟蕩漾沿芳隄淡紅片玉滿流水中有誰家桃李蹊  
刺棹沿洄忘遠近山重水轉迷東西金豪瞥見林中犬



玉羽旋聞隴上雞相逢巾屨如圖畫驚聞有客爭邀攜  
穿花行到花盡處華鋪畫敞同攀躋簾櫳炫煥鬪金碧  
樓閣玲瓏凝紫霓瓊杯石髓甘如醴碧桃瑩膩堆玻瓈  
慙慙歷問塵寰事聞說興替聲如嘶自言疇昔避閭左  
鄉鄰負抱謀巖棲入山惟憂山路淺穿雲涉水隨磨麤  
山深遂與人境絕回首但見雲萋萋年年桃花又桃實  
不聞劉項鳴鉦輦當時祇恨棄桑梓此日却悟凌丹梯  
酒闌歷覽煙霞外天風浙浙鷓鴣啼塵羈世網遠心目

年齡便可乾坤齊俗緣如瑕滌不去荆布還念糟糠妻  
思家欲歸歸却悔憶路重來來已迷碧砌朱欄無處覓  
溪長煙草寒淒淒玉京雲路今何在千年圖寫傳曾緹  
高堂衆客一經目盡願乘景騎狻猊祖龍虐政猛於虎  
療飢消渴資黔黎霜髯黃口不相保四海慘戚如牢狴  
當時人世無居處往往雲壑為中閨竄身幽側寧所樂  
骨肉苟免資塵泥種桃為食不如黍豈惡芻豢忘烹割  
全家邂逅登金籙此事渺忽無端倪清時汪濊下膏澤

浸潤生齒如孩提日長不使舖糠粃飯炊彫胡截馱  
歲寒豈獨完袒褐霧縠衣裘雲錦袿翦除敗類毓良淑  
宛若嘉穀純無稊干羽雍容絕征戍春來處處操鋤犁  
今人不似秦人苦寄身何用武陵溪

失題

蜂鬚萎蕤花脫萼粉蝶流鶯何處着暖融密卷玉為掾  
一點明星坐中落猩脣血重鮫綃薄百出寶蓮金鈿錯  
蕙蘭不斷起長烟餘香隨風度羅幕天階漫激鳴籤響

壺中不夜春常若何人天外引長繩剛愁日下西山脚